



N°7265
Entrée le 30.11.2022
Déclarée recevable
Président de la Chambre des Députés
(s.) Fernand Etgen
Luxembourg, le 01.12.2022

Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 30/11/2022

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Bannenzeg Sécherheet weiderzeleeden.

Eis gouf zougedroen, dass et ëmmer erëm zu Signalementer wéinst Mëssstänn kënnt. Dobäi soll et ëm de Verdacht vu sexueller Gewalt oder och physischer Gewalt géint Kanner goen. Zu dëse Signalementer soll et souwuel a staatlech wéi och private Foyere kommen, grad ewéi och a Crèchen, Maisons Relaisen, Schoulen an aner Institutiounen fir Kanner.

An deem Zesammenhang wéilt ech dem Minister dës Froe stellen:

1. Opgelëscht pro Joer a mat der Ënnerscheidung tëscht privaten a staatlech Strukturen, wéi vill Signalementer iwwer Mëssstänn a Foyeren, wéi zum Beispill iwwer de Verdacht vu physischer Gewalt oder sexuellem Mëssbrauch, goufen et zënter 2010?
2. Wéi vill Signalementer, opgelëscht pro Joer a mat der Ënnerscheidung tëscht de verschiddenen Zorte vu Strukturen, goufen et iwwer Mëssstänn vu sexueller oder physischer Gewalt a Crèchen, Maisons Relaisen, Schoulen an aneren Institutiounen fir Kanner zënter 2010?
3. Wéi vill Enquête, opgelëscht pro Joer, goufen Opgrond vun dëse Signalementer ageleet?
4. Opgelëscht pro Joer, wéi vill vun dësen Enquête goufen ouni Suite klasséiert?
5. Opgelëscht pro Joer, wéi vill vun dësen Enquête hunn zu Kontrollen a Foyere gefouert?
6. A wéi vill vun dëse Fäll lafen aktuell nach Enquêtes?
7. A wéi ville Fäll ware Kanner betraff, déi a staatlechen Institutiounen placéiert an ënnert enger Tutelle waren?

Mat déiwem Respekt,



www.piraten.lu



CLEMENT Sven
Deputéierten





**Gemeinsam Äntwert vun der Madamm Justizministesch Sam Tanson an dem Här
Bildungsminister Claude Meisch op d'parlamentaresch Fro n°7265 vum 30.
November 2022 vum honorabelen Deputéierten Sven Clement iwwert Gewalt an
de Crèchen a Foyeren**

Den informatesche System vun de Justizautoritéiten erlaabt et net, déi gefrote ventiléiert Zuelen ze liwweren. Déi ënne gefouerten Zuelen ginn déi global Unzuel vun de Procès-verbaux a Signalementen am Beräich vum Jugendschutz déi un d'Parquete vu Lëtzebuerg an Dikrech gaange sinn un. D'Procès-verbaux bezéie sech majoritär op Mannerjäreger déi eng Strofdot begaangen hunn, mee se kënnen och mannerjäreg Affere concernéieren.

Et sief bemierkt, dass d'Procès-verbaux an d'Signalementen net zwéngend matenee verbonne sinn, vu dass e Procès-verbal net onbedéngt d'Suite vum Signalement ass.

Activités des parquets de la jeunesse

		2016	2017	2018	2019	2020	2021
Procès-verbaux	Parquet Luxembourg	2144	1791	1749	2221	1651	2237
	Parquet Diekirch	273	364	440	396	407	613
	Total	2417	2155	2189	2617	2058	2850
Signalements	Parquet Luxembourg	670	623	651	764	749	1021
	Parquet Diekirch	197	232	295	301	223	326
	Total	867	855	946	1065	972	1347

De Ministère fir Educatioun, Kanner a Jugend, féiert keng Statistiken, déi spezifesch op sexuell oder physisch Gewalt aginn. De Grond dofir ass, dass d'Enquête judiciaire feststellt, ob e Fall vu sexueller oder physischer Gewalt virläit. Aus der Perspektiv vun de Professionelle vun der Kandheet an der Jugend steet d'Wuel vum Kand am Mëttelpunkt. Besteet de Verdacht, dass d'Wuel vum Kand aus wéi enge Grënn och ëmmer a Gefor ass, sinn déi Professionell gehalen, e Signalement bei der Justice ze maachen.

Am non-formale Bildungsberäich fir Kanner (Crèche, Maison relais, Foyer scolaire, Dageselteren) sinn zanter 2011 dem Ministère fir Educatioun, Kanner a Jugend (MENJE) 20 esou Fäll bekannt, wou e Verdacht virlooch, dass d'Wuel vun engem Kand gefäerdet wier. A verschiddene Fäll huet de Ministère d'Signalementen um Parquet, deen hei zoustänneg ass, selwer gemaach op Basis vun Informatiounen, déi hie krut. An anere Fäll ass de MENJE doriwwer informéiert ginn, dass aner Leit, zum Beispill d'Elteren, eng Plainte gemaach hunn.



Hei d'Oplëschung pro Joer, woubäi fir d'Joer 2010 keng Statistike virleien.

2011 : 3

2012 : kee Signalement

2013 : 3

2014 : 3

2015 : 3

2016 : kee Signalement

2017 : 1

2018 : 2

2019 : 3

2020 : 1

2021 : 1

Et ass ze bemierken, datt an dësem Beräich d'Strukturen net vum Staat selwer, mee vun externe Bedreier geréiert ginn. D'Signalementer mussen net iwwer de Ministère lafen, mee kënnen vun den Elteren oder och vum Personal selwer gemaach ginn.

Wat d'Schoule betrëfft, sou si sämtlech Membere vun der Schoulcommunautéit dru gebonnen, am Verdacht op Mësstänn vu sexueller oder physischer Gewalt ee Signalement ze maachen, woubäi eng zentraliséiert Erfaassung vun de Mësstänn duerch de MENJE net virgesinn ass, well all eenzelnen Agent hei an der Responsabilitéit ass. Dat selwecht gëllt fir d'Institutiounen fir Kanner.

Lëtzebuerg, den 18 Januar 2023.

D'Justizministersch

(s.) Sam Tanson